

## **Mukanda ua Paulu kuli vaka** **NGALATA** **Citsindikisi**

<sup>1</sup> Paulu kanganda uje keti uakuhuma ku vantu cipue kuhitila mu muntu, vuno honi kuhitila muli Yesu Kilistu na Njambi Tate, uje uamusanguile ku vatsi,

<sup>2</sup> yange na vamuanetu voshe vaje vanjili navo, tuli nakutuma vihindu,

Ku vikungulukilo via mu Ngalatiya:

<sup>3</sup> Kavumbi kakale neni na ciyulo vije vihumu kuli Njambi Tate na Muene yetu Yesu Kilistu,

<sup>4</sup> uje ualihanene ikeye vavenia ha vipi vietu mukutuhumisa ku vupi ovu vua vuavuno, kuya ku cizango ca Njambi yetu Tatetu.

<sup>5</sup> Kuli ikeye kukale vumpau ku miaka yoshe ya yaye! Ameni.

### *Muzimbu Umo Uacili*

<sup>6</sup> Njalikomokela ngeci yenii voshe muahumu vuasi kuli uje uamisanene mu kavumbi ka Kilistu nakutengulukila ku muzimbu ueka.

<sup>7</sup> Keti ngue nguavo kuli muzimbu ueka naua, vuno honi kuli vamo vaje vali nakumitanganesa kaha vatonda kutangula muzimbu ua Kilistu.

<sup>8</sup> Vuno honi cipue vene nga yetu indi kangelo uakuhuminina kuilu, uje akambulula muzimbu ueka uakuliseza na uje utuambulule yetu kuli yenii, kaha apue uakusinga.

<sup>9</sup> Ngue muje mutunahandeka hakulivanga, nahano hanga naua njicihandeka nguange, nga kukala umo akambulula kuli yeni muzimbu ueka uakuliseza na uje umuatambuile, kaha apue uakusinga.

<sup>10</sup> Nkuma yange njilinakutonda ngeci vantu vanjishangale indi Njambi? Indi nkuma njilinakueseka kuvuahelesa vantu? Nga hanga njicili nakuvuahelesa vantu, ngue kunjapuile njingamba ya Kilistu.

*Muje Paulu uapuile Kanganda*

<sup>11</sup> Omuo njitonda linga mutantekeye vamuanetu, ngeci muzimbu uje yange njambuluile kuuapuile muzimbu uakuhuma ku muntu.

<sup>12</sup> Omuo kunjautambuile kuli muntu, cipue kulilongesauo, vuno honi uezile kuhitila mukusolola ca Yesu Kilistu.

<sup>13</sup> Omuo munevu vuyoye vuange vualaja mu futisi ya Vayunda, muje vati munjapakesele cikungulukilo ca Njambi muakupihia nakutonda kucinongesa.

<sup>14</sup> Kaha njahianene mu futisi ya Vayunda kupulakana vavengi vaje mutunapuila hamo ku miaka hhakati ka vantu vange, njalianene cikuma ku vilika via vatatetu.

<sup>15</sup> Vuno honi omo Njambi uje uanjihanguile laja te kanda njisemuke, nakunjisana kuhitila mu kavumbi kendi,

<sup>16</sup> uavuahahelele cikuma hakusholola Munendi kuli yange linga njikamuambulule hhakati ka vaje keti Vayunda, kunjaile kuli muntu umo mukunjinangula,

<sup>17</sup> cipue kuya ku Yelusalema kuli vaje vapuile tunganda yange te kanda, vuno honi njaile mu Alambiya kaha naua njahilukile ku Ndamasiku.

<sup>18</sup> Ambahoni munima ya miaka itatu njaile ku Yelusalema mukumenekela Kayafase kaha njakele nendi kuje matangua likumi na atanu.

<sup>19</sup> Vuno honi kunjakamueneko tunganda veka naua kuvanga lika Tiango munaina ya Muene.

<sup>20</sup> Muli evi njinasonekela yeni, vusunga vua Njambi kunjesi nakukuisa.

<sup>21</sup> Ambahoni njaile ku mitambela ya ku Silia na Silisha.

<sup>22</sup> Vuno honi hanga vene kuvanjitantekeyele ku vikungulukilo via Kilistu via mu Yundeya,

<sup>23</sup> vovuile lika nguavo, “Uje uatuyandesele vuno honi alinakuambulula lutsilielo luje luatondele kunongesa.”

<sup>24</sup> Kaha vahanene vumpau kuli Njambi omuo yange.

## 2

### *Paulu na Tunganda Vakuavo*

<sup>1</sup> Ambahoni munima ya miaka likumi na iuana njaile naua ku Yelusalema na Mbanambase hamolika na Tito.

<sup>2</sup> Njaile kuje omuo ya kusolola, kaha njaliuanene navo vaje vantuama vuno honi capuile mu vushueke kaha njavahanene muzimbu uje unjikambulula hhakati ka vaje keti Vayunda, njatondele kutantekeya muacili nguange kunjishatukila cipue njashatukilile viangoco.

<sup>3</sup> Vuno honi Tito uje uakele nange kuva-musindiye linga alovoke, cipue vene ikeye uapuile Kangelengu.

<sup>4</sup> Vuno honi omuo ya vaka kutsiliela vama-kuli vaje vezile mu vushueke, vaje vezile mukuseveleka linga vakuende vungungu ha kupatuka cetu kuje tulinaco muli Kilistu Yesu, linga vatupuisse vandungo.

<sup>5</sup> Kutualihanene kuli vakevo cipue muka ntsimbu lika, tualingile eci linga vusunga vua muzimbu vavutulikile yeni.

<sup>6</sup> Vuno honi kuli vaje vavakele nakuhana kasingimiko ngue cuma cije caseho, vuno honi muoshe muje muvafuile, kuvalumbunukile ambe cimo kuli yange, Njambi kakele na civembulu, vaje vanjihandeka nguange vantu vakulema kuvahakeleko cimo kuli yange.

<sup>7</sup> Vuno honi mu ngila ikuavo naua omo vamuene nguavo njakakateya kuambulula muzimbu kuli vaje vakuhona kulovoka, ngue Petulu muje muakakateyele kuambulula muzimbu kuli vaje kulovoka,

<sup>8</sup> omuo Njambi uje uakele nakupangesa Petulu ha vipangi via vaka kulovoka uapangesele nange naua kuli vaje keti Vayunda.

<sup>9</sup> Omo vanongonuene kavumbi kaje kavanjihanene, kaha Tiango, na Kayafase, na Iuano vaje vavakele nakuhana kasingimiko ngue vantuama, havanene yange na Mbanambase livoko lia cilio mukupangela hamo, linga tuye kuli vaje keti Vayunda kaha vakevo kuli vaje vakulovoka.

<sup>10</sup> Voshe valombe yetu linga tuanuke tuhutu, eci cikeco cuma cije cinjikatondo kulinga.

*Paulu Atenukila Petulu ku Antioke*

<sup>11</sup> Vuno honi omo Kayafase uezile ku Antioke njamusembuluile ku mesho endi omuo ikeye uapihisile.

<sup>12</sup> Omuo tele kanda vamala vamo veje kuli Tiango, ikeye ualile na vaje keti Vayunda, Vuno honi omo vezile uavashondolokele nakulihumisako ikeye vavenia mukuteua kulovoka.

<sup>13</sup> Kaha ikeye na vakuavo voshe Vayunda vapusukile kulinga civembulu linga vene cipue Mbanambase na ikeye vamutanguile ku civembulu cavo.

<sup>14</sup> Vuno honi omo njamuene nguange kuvesi nakulinga viakusungama ha vusunga vua muzimbu, kaha njahandেকে na Kayafase ku mesho avo voshe nguange, “Nga yove, cili uje Kayunda uyoya ngue uje keti Kayunda vuno honi keti ngue Kayunda, kaha uasa vati kulinga vaje keti Vayunda linga vayoye ngue Vayunda?”

*Vayunda na vaje Ketu Vayunda Vanovoka ha Lutsilielo*

<sup>15</sup> Yetu vavenia vaje Vayunda ku cisemua kaha keti vaje keti Vayunda vaka vipi,

<sup>16</sup> tutantekeya nguetu muntu kasa kupua uakusungama ha vipangi lika via lishiko vuno honi kuhitila mu lutsilielo muli Kilistu Yesu, cipue yetu tunatsiliela muli Kilistu Yesu linga tupue vakusungama ha lutsilielo muli Kilistu, keti ku vipangi via lishiko omuo ha vipangi lika via lishiko naumo uahi akapuila uakusungama.

<sup>17</sup> Vuno honi nga mukusetela kuetu linga tupue va vusunga muli Kilistu, kaha yetu vavenia tualiuanene kupua vaka vipi, kaha nkuma Kilistu ikeye liavenia vupi ndi? Cilivene kuahi!

<sup>18</sup> Vuno honi nga naua njitunga viuma vije vinjalundumuine, kaha njalimono yange vavenia nguange muka kupihisa.

<sup>19</sup> Omuo yange kuhitila mu lishiko njatsile ku lishiko, linga njikayoye kuli Njambi.

<sup>20</sup> Vanjishukikile hamo na Kilistu, kaha keti yange naua uje ayoya vuno honi Kilistu ikeye uje ayoya muli yange, kaha na muono uje honi njiyoya mu ntsitu njiyoyela ha lutsilielo muli Muna Njambi, uje uanjizangele nakulihana ikeye vavenia hali yange.

<sup>21</sup> Kunjasa kuteua kavumbi ka Njambi, omuo nga vusunga vavuuana kuhitila mu lishiko, kaha Kilistu viahi viatsililile.

### 3

#### *Lishiko cipue Lutsilielo*

<sup>1</sup> Eni vilema vaka Ngalatiya! Iya namilouo, ku mesho aveya Yesu Kilistu vamuhanene ku vivunga nakumushukika?

<sup>2</sup> Maneni njimihule eci lika: Nkuma yeni mu-atambuile Cimbembesi ha vipangi via lishiko indi vukuvuilila na lutsilielo?

<sup>3</sup> Muvilema vati yeni? Hakuputuka na Cimbembesi, nkuma mumanusula honi na ntsitu ndi?

<sup>4</sup> Nkuma muahitila vene mu viuma viavingi muangoco ndi? Cilivene nga vinayi muangoco.

<sup>5</sup> Nkuma uje akamihana Cimbembesi naku-panga vikomoueso hhakati keni akavipanga na vipangi via lishiko indi ha kuvuilila na lutsilielo?

<sup>6</sup> Mukemo vene Avilahama “uatsilielegelele Njambi, kaha vamutandeleleko kupua uavusunga.”

<sup>7</sup> Taleni omu mukemo mucinafu yeni vamala va lutsilielo vaje vakevo vana va Avilahama.

<sup>8</sup> Kaha na visoneka hakumona vije viliku-lutue ngeci Njambi akalinga vaje keti Vayunda kupua vaka vusunga ha lutsilielo, nakuambulula muzimbu mukulivanga kuli Avilahama nguendi, “Muli yove mafuti oshe akakuisuliua.”

<sup>9</sup> Nankuma, vaje voshe vantu vali na lutsilielo vanakuisuliua hamo na Avilahama uje uakele na lutsilielo.

<sup>10</sup> Omuo voshe vaje vajendamena ha vipangi via lishiko, vali muintsi lia cisingo, omuo vav-isoneka nguavo, “Nasingiua uoshe uje akani-ungu viuma vioshe vije vivasoneka mu livulu lia lishiko nakuvilinga.”

<sup>11</sup> Honi calumbunuka muacili ngeci naumo uahi muntu ivapuisa uavusunga kuli Njambi ha lishiko, omuo “Uoshe uje alinga vusunga kuhitila mu lutsilielo akayoya.”

<sup>12</sup> Vuno honi lishiko kuliakundamene ha lutsilielo, omuo “Uoshe uje avilinga akayoya navio.”

<sup>13</sup> Kilistu uatukulile yetu ku cisingo ca lishiko hakupua cisingo omuo yetu omuo vacisoneka nguavo, “Nasingiua uje alishukika ha muti,”

<sup>14</sup> linga muli Kilistu Yesu ngeci vije vikuisulo via Avilahama vije kuli vaje keti Vayunda, kaha

linga tutambule cikulaheso ca Cimbembesi kuhi-tila mu lutsilielo.

### *Lishiko na Cikulaheso*

<sup>15</sup> Vavusamba vange njihana cimueso ca litan-gua lioshe mu muono uetu, naumo uahi asa kuhumisa ku litavasano lia muntu cipue kuvuelelelako, hanima ya kulikuta.

<sup>16</sup> Honi vikulaheso vivapangelele Avilahama na mutekuluila uendi. Visoneka kuvihandeka nguavio, “Nakuli vatekuluila,” kulumbununa vavengi, vuno honi kulumbununa umo lika, “Nakuli mutekuluila uove,” ikeye Kilistu.

<sup>17</sup> Evi vikevio vinjili nakulumbununa: lishiko lije liezile ha miaka vihita viuana na makumi atatu (430) yakunima, kuliayenguile litavasano lia laja lije Njambi ualingile, nakuhumisa cikulaheso cendi.

<sup>18</sup> Omuo nga kusuana cakundama ha lishiko, kaha kucesi naua ha cikulaheso, vuno honi Njambi uacihanene kuli Avilahama ha cikulaheso.

<sup>19</sup> Kaha omuo vikahoni lishiko? Valihakeleko omuo ya vupi, kuvanga noho hakezila uje mutekuluila uje ivalingilile cije cikulaheso. Lishiko valihanene kuhitila muli tungelo nakulikundika kuli muka kuimanena mukati.

<sup>20</sup> Honi muka kuimanena mukati emanena vavengi, vuno honi Njambi uapua umo.

### *Vutumbe vua Lishiko*

<sup>21</sup> Nkuma lishiko lilinakuluisa vikulaheso via Njambi ndi? Cilivene kuahi, omuo nga lishiko valihanene nguavo liyoyese, kaha cilivene vusunga ngue vuneja omuo ya lishiko.



<sup>22</sup> Vuno honi visoneka vinahaka viuma vioshe ku vupi, linga vioshe vije vivakulahesele ku lutsilielo muli Yesu Kilistu vakavihane kuli vaje vatsiliela.

<sup>23</sup> Honi tele kanda lutsilielo luije, vatukutile ku lishiko nakutupuisa vinzinda noho vakasholola lutsilielo.

<sup>24</sup> Kaha na lishiko tuakele nakuliendesa kuvanga noho hezilile Kilistu, linga vatupuisse vaka vusunga kuhitila mu lutsilielo.

<sup>25</sup> Vuno honi luje lutsilielo luneja, kaha honi kutuapuila naua vinzinda va lishiko.

<sup>26</sup> Omuo muli Kilistu Yesu muva voshe munapu vana va Njambi kuhitila mu lutsilielo.

<sup>27</sup> Omuo vuingi vueni vaje vavambuitikile muli Kilistu munazala Kilistu.

<sup>28</sup> Kukuesi honi Kayunda cipue Kangelengu, kukuesi ndungo cipue uakupatuka, kukuesi yala cipue mpuevo, omuo muva voshe munapu umo muli Kilistu Yesu.

<sup>29</sup> Kaha nga munapu muva Kilistu, kaha muvatekuluila va Avilahama, kaha muva kakusuana kuya ku cikulaheso.

## 4

<sup>1</sup> Njilina kulumbununa nguange uje muka kusuana nga acili kanike kaha akapua ngue ndungo cipue vene oku ikeye vene vavenia vikumba.

<sup>2</sup> Vuno honi akakala mu mavoko avakakumu-niunga na vaje vavanatsiliela kuvanga noho ha litangua lije liatumbuile ishe.

<sup>3</sup> Kaha netu vene omo tele tu vanike tuapuile tu vandungo va vimbembesi vije vikendesa mavu.

<sup>4</sup> Vuno honi omo ntsimbu yahetele, Njambi uatumine Munendi uakusemuka ku mpuevo, uakusemukila mu lishiko,

<sup>5</sup> mukukula vaje vakele muintsi lia lishiko linga vatupuisse vana.

<sup>6</sup> Kaha omuo munapu mu vana, Njambi natumu Cimbembesi ua Munendi mu mitima yetu, uje akalili nguendi, “Amba! Tate!”

<sup>7</sup> Nankuma, kuhitila muli Njambi kuuapuile naua ndungo vuno honi muana, kaha nga unapu u muana kaha yove muka kusuana.

### *Kulishoshomuena ca Paulu hali vaka Ngalatiya*

<sup>8</sup> Ku laja, omo tele kanda utantekeye Njambi, muakele mu vundungo kuli vaje ku vuntu keti vanjambi.

<sup>9</sup> Vuno honi omuo muatantekeya Njambi, cipue omuo honi Njambi namitantekeya, nkuma vati naua muhilukila kuli vije vimbembesi via kuzeya nangoco, vije mutonda naua linga mupue vandungo vavio?

<sup>10</sup> Yeni mukaniungu matangua, na vingonde, na vintsimbu na miaka.

<sup>11</sup> Njilina kulishoshomuena nguange hamo nzili yange hali yeni inai muangoco.

<sup>12</sup> Vamuanetu njilinakumilambelega linga mupue ngue yange, omuo nange naua njinapu ngue yeni. Kumuanjilingile cipue vupi vumo.

<sup>13</sup> Muatantekeya ngueni omuo yakuvavala mukemo njambuluile muzimbu kuli yeni ha kuli-vanga.

<sup>14</sup> Kaha cipue vene cihindu cange capuile vieseko kuli yeni, kumuanjiyenguile cipue kun-jisembulula, vuno honi muanjitambuile ngue kangelo ua Njambi, cipue ngue Kilistu Yesu.

<sup>15</sup> Vikahoni vije muavuahelelele cikuma? Omuo njinapu mukaleho nguange nga casiuile ngue muahumisile mesho eni naku ahana kuli yange.

<sup>16</sup> Nkuma honi njinapu citozi ceni omuo yakumileka vusunga ndi?

<sup>17</sup> Ovo vantu vamuesa cizango hali yeni vuno honi kuakuhona seho, vatonda linga vamitepese kuli yetu linga muzange vakevo.

<sup>18</sup> Omuo ha mulonga uacili, cikapu cacili ntsimbu yoshe kulizanga, kaha keti lika omo nga tulihamo.

<sup>19</sup> Vana vange vacizango, vaje hanga naua njicili mu mushongo uje ngue mpuevo atonda kusema kuvanga noho muatambula Kilistu muli yeni.

<sup>20</sup> Njitonda ngue njikale neni hano linga citengulule lizi liange omuo njalishoshomuena hali yeni.

### *Cimueso ca Hangale na Sala*

<sup>21</sup> Njilekeni, yeni vaje vatonda kukala muintsi lia lishiko, nkuma kumuekulivua lishiko ndi?

<sup>22</sup> Omuo vanacisoneka nguavo Avilahama uakele na vana vavali va vamala, umo uakuli mpuevo ua ndungo kaha mukuavo uakuli mpuevo uakupatuka.

<sup>23</sup> Vuno honi muana uje uakuli ndungo uasemukile kuya ku vuntu, kaha muana uje uakuli uakupatuka uasemukile kuya ku cikulaheso.

<sup>24</sup> Honi eci cinapu ngue cisimo, ava vampuevo vanapu matavasano avali. Limo lihuma ku Munkinda ua Sinai, kusemena vana mu vundungo, ou ikeye Hangale.

<sup>25</sup> Honi Hangale ikeye Munkinda ua Sinai mu Alambiya, ikeye nemanena Yelusalema ije iliko, omuo ikeye ali mu vundungo na vana vendi.

<sup>26</sup> Vuno honi Yelusalema ije ili kuilu ikeyo yakupatuka, kaha ikeye nanetu.

<sup>27</sup> Omuo vanacisoneka nguavo,  
“Vuaheleleni, yeni vantsimpi vaje kuvemukusema!  
Lileni nakutambeka na nzolela, yeni vaje kumuesi mu mushongo uakusema!  
Omuo vana va uje ivasezele vanapu vavengi kupulakana vana vendi uje nashomboka.”

<sup>28</sup> Honi yetu, vamuhanetu, ngue Isake, yetu tu vana vacikulaheso.

<sup>29</sup> Vuno honi ngue kuntsimbu ije uje muana uasemukile kuya ku vuntu uapakesele uje uasemukile kuya ku cimbembesi, kaha omu mukemo mucilimo cipue hano.

<sup>30</sup> Vuno honi visoneka nkuma vihandeka vika? Vihandeka nguavio, “Sheka mpuevo ua ndungo na munendi, omuo muana uje ua ndungo kasa kukasuana hamo na muana ua uje mpuevo uakupatuka.”

<sup>31</sup> Nankuma, vamuhanetu, yetu keti tu vana va uje ndungo vunono honi va uje mpuevo uakupatuka.

## 5

### *Niungeni Kupatuka Ceni*

<sup>1</sup> Omuo ya kupatuka mukemo Kilistu natupatula, nankuma, imaneni ngoo kaha keti mulihane naua ku mutiyo ua vundungo.

<sup>2</sup> Honi yange Paulu, njihandeka kuli yeni nguange nga mutambula kulovoka, kaha Kilistu kakakala na seho kuli yeni.

<sup>3</sup> Njihilukilaho naua kunangula ku yala uoshe uje akatambula kulovoka nguange ikeye vanamukutu mukutulika lishiko lioshe.

<sup>4</sup> Vanamihumisa kuli Kilistu yeni voshe vaje vavapuisa va vusunga ku lishiko, munahumu ku kavumbi.

<sup>5</sup> Omuo kuhitila muli Cimbembesi ha lutsilielo, tulinakuvandamena kutsiliela ca vusunga.

<sup>6</sup> Omuo muli Kilistu Yesu kukuesi kulovoka cipue kuhona kulovoka cije cili naseho, vuno honi lutsilielo lupanga kuhitila mu cizango.

<sup>7</sup> Muakele nakulinga muacili, kaha iya honi uamivindikile kuononoka vusunga?

<sup>8</sup> Eci kusindiya kucahumine kuli uje uamisanene.

<sup>9</sup> Kacimbaluila kakandende kakafutunuisa mukasha uoshe.

<sup>10</sup> Njatsiliela muli Muene nguange kumukatambula cuma ceka kupulakana cange, kaha na uje uoshe alinakumiyandesas akauana cisompelo cendi.

<sup>11</sup> Vuno honi nga yange vamuaneetu, hanga njicilinakuambulula kulovoka, nkuma vika honi hanga vacinjipakesa? Ha mulonga ou cije cit-suntsuiso ca cilindakano vanacihumisa.

<sup>12</sup> Njitonda linga vaje vantu vaje valinaku-mitanganesa keti valengesele aha lika, veceleni vatualeleleho nakulipuisa vayunuke.

<sup>13</sup> Vamuanetu, omuo yeni vamisanene mukupatuka, kaha honi keti mupangese kupatuka ceni cipue lisesa lia ku muvila ueni ua ntsitu, vuno honi kuhitila mu cizango pueni vangamba kuli umo na mukuavo.

<sup>14</sup> Omuo lishiko lioshe vanalishulisisa mu lizi limo lika eli ngualio, “Zanga mukueni ngue muua lizanga yove vavenia.”

<sup>15</sup> Vuno honi nga mulishuma nakulivulumuna umo na mukuavo kaha nangukeni linga keti mukalinongese umo na mukuavo.

### *Cimbembesi na Cisemua ca Vuntu*

<sup>16</sup> Vuno honi njihandeka nguange endeni na Cimbembesi kaha keti muvuahese mashungu aku muvila ua ntsitu.

<sup>17</sup> Omuo mashungu aku muvila ua ntsitu akaluisa Cimbembesi, kaha na mashungu a Cimbembesi akaluisa muvila ua ntsitu, omuo evi kuvialitombuele, kaha vikamikingi ku kulinga vije vimutonda kulinga.

<sup>18</sup> Vuno honi nga Cimbembesi cimituamenena kaha kumuesi muintsi lia lishiko.

<sup>19</sup> Honi vipangi via muvila ua ntsitu viapua viangoco: vikevio viapua vupangala, kulijualesa, vilinga via kuteuesa,

<sup>20</sup> kulemesa tumponia, vulozi, vutozi, vaka kulua, cipululu, vutenu, vaka kulizanga vavenia, vaka kulitepesa ku vakuavo, vaka cimbembesi ca kuzanga viuano,

<sup>21</sup> vaka lifuua, vaka kupenda, nakulinga viuma vieka ngue evi. Njiminangula ngue muje naua munjaminanguile hakulivanga, ngeci vaje voshe

vakalingi viuma evi kuvakasuana vumuene vua Njambi.

<sup>22</sup> Vuno honi vushuka vua Cimbembesi vuapua cizango, nzolela, ciyulo, lukakateya, ngozi, vucili, kukonkama,

<sup>23</sup> kulikehesa na kulihilula, kaha kukuesi lishiko liluisa viuma evi.

<sup>24</sup> Kaha vaje voshe vakundama kuli Kilistu Yesu vanashukika muvila ua ntsitu na vilinga viauo na mashungu auo.

<sup>25</sup> Nga tuyoyela hali Cimbembesi, kaha tuyeni tuende naua na Cimbembesi.

<sup>26</sup> Kutuapandele kupua vaka kulihalesa cipue kuliputuka umo na mukuavo, cipue kuvuila cipululu umo na mukuavo.

## 6

### *Liambateseni Viteli via Umo na Mukuavo*

<sup>1</sup> Vamuanetu, nga muntu umo vanamuuana na mulonga uli uoshe, kaha yen i vaje vanakulahela munapande kumusungamesa mu cimbembesi ca kulikehesa. Kaha lihiluleni yen i vavenia kuteua mukakovele naua mu ceseko eci.

<sup>2</sup> Liambateseni viteli via umo na mukuavo, kaha mukulinga eci mukashulisisa lishiko lia Kilistu.

<sup>3</sup> Omuo nga uoshe uje asinganieka nguendi napu uakama, vuno honi keti mukemo muanapu, kaha ali nakulikuisa ikeye vavevia.

<sup>4</sup> Vuno honi muntu na muntu ahilule vipangi viendi vavenia, kaha kuya ku vipangi viendi akasa kulihalesa ikeye vavenia keti hali mukuavo.

<sup>5</sup> Omuo muntu na muntu akaliambatela citeli cendi vavenia.

<sup>6</sup> Muntu uoshe uje ivanalongesa lizi akalipangela viuma vioshe viacili na uje namulongesavio.

<sup>7</sup> Keti vamikuisse, Njambi kuvekumushendumuna, omuo vioshe vije viakuna muntu, vikevio naua viakateja.

<sup>8</sup> Omuo uoshe uje akuva ku muvila uendi, kaha ku muvila uendi naua kukeko kuakateja kunonga. Vuno honi uoshe uje akuva ku Cimbembesi, kaha ku Cimbembesi naua kukeko kuakateja muono ua yaye.

<sup>9</sup> Keti tuhone mukulinga viuma viacili, omuo ntsimbu ikeja ije tukateja muacili nga tutualelelaho nalukakateya.

<sup>10</sup> Nankuma, omuo tucili nantsimbu, tuyeni tulinge vucili ku vantu voshe, kaha cikuma kuma ku ntanga ije ya lutsilielo.

### *Kunangula Cakumanusuila na Cihindu*

<sup>11</sup> Taleni kuhama ca visona vije njili naku-misonekela na livoko liange.

<sup>12</sup> Vaje vakatondo kuvuahelesa vantu ku ntsitu vakevo vaje vakamisindiya linga mulovoke. Eci vakacilingila lika linga vateue kuvapakesa omuo ya cilindakano ca Kilistu.

<sup>13</sup> Omuo cipue vene vaje vanalovoka kuvekutulika lishiko, vuno honi vakashunguiya yeni linga mulovoke ngeci vauane vumpau mu muvila ueni.

<sup>14</sup> Vuno honi yange kunjikalihalesa ha lievi, kuvanga lika ha cilindakano ca Muene uetu Yesu Kilistu, uje muli ikeye mavu vanaashukika kuli yange, nange ku mavu.



<sup>15</sup> Omuo kukuesi na mulonga uahi cipue ualovoka cipue kuualovokele, vuno honi cakama kupua uakutanga lualuha.

<sup>16</sup> Ciyulo na cikeketima vikale kuli yeni voshe vaje venda na lishiko eli, na kuli Isaleli ya Njambi.

<sup>17</sup> Kuhuma hano, keti kukale muntu umo anjihane vukalu, omuo njinambata vitamba via Yesu ha muvila uange.

<sup>18</sup> Kavumbi ka Muene uetu Yesu Kilistu kakale na cimbembesi ceni, vamuanetu. Amen.

**Nkangala Bible Translation**  
**The New Testament in the Nkangala language of**  
**Angola: Nkangala Bible Translation (New Testament)**  
copyright © 2024 The Word for the World International

Language: (Nkangala)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-17

---

PDF generated using Haiola and XeLaTeX on 17 May 2025 from source files dated 17 May 2025

9a9c909c-dd81-59f5-8c45-51bc768de51c